

1975-07-01 – SS Paulus VI – Epistula ‘Tot Inter Rerum’

PAULUS PP. VI

***EPISTULA AD E.MUM P.D. SEBASTIANUM S.R.E.
CARDINALEM BAGGIO
SACRAE CONGREGATIONIS PRO EPISCOPIS PRAEFECTUM
QUEM SUMMUS PONTIFEX MISSUM EXTRAORDINARIUM
DELIGIT UT EUCHARISTICI COETUS,
EX TOTA BRASILIA IN URBE MANAO HABENDI,
CELEBRITATIBUS PRAESIDEAT***

TOT INTER RERUM

Tot inter rerum vicissitudines, quae animum Nostrum pulsant et angunt, laetus ad Nos allatus est nuntius mox fore, ut in urbe Manao nonus ex tota Brasilia Eucharisticus Conventus celebretur. Cuius amplissimae patentis regionis incrementa hominum studia merito excitant, siquidem nonnullae plagae, quae adhuc paene remotae esse videbantur ab humano cultu, iam ad territorium, communi civili utilitati et emolumento deserviens, iadiunguntur. Magnanimo enim capto consilio et technicis instrumentis adhibitis, quae aetas nostra induxit, partes eiusdem regionis, quae ad aquilonem, quae inter septentriones et orientem spectant, quae mediae orientales appellantur, iam civili cultui patescunt.

Sacri vero pastores, dum eiusmodi progressionem gestientibus animis considerant, eo, pro conscientiae officio, curas intendunt, ut tam immensum inceptum, qua humanae vitae rationibus fovendis provehendisque consulitur, etiam in religionis bonum vertat, scilicet ut spiritualia commoda, ex evangelico nuntio proficiscentia, ibidem spargantur et roborentur.

Veruntamen, ut liquet, eiusmodi opus non solum pastores tangit, sed etiam omnes, qui sunt in Brasilia, Christifideles: quibus cunctis est annitendum, ut gentes, quae in praedictis incolunt plagis, Ecclesiae penitus incorporentur. Effulgeat igitur apud universos verus ille sensus communitatis, quod acti non modo ea, quae ad socialem profectionem pertinent, alacres persequantur, sed etiam, idque potissimum, panem fidei, spei et caritatis fratribus impertiant.

Quae omnia praeclarissime fient, si veritas mysterii eucharistici impense creditur et hoc donum infiniti amoris divini summa, ut decet, reverentia colitur. Etenim sanctissima Eucharistia, qua non solum gratia sed auctor ipse gratiae continetur, plurimum valet ad vitam pietatis rationibus conformandam et ad conglutinandas caritatis vinculo voluntates et ad Ecclesiae compagem coagmentandam. Qui enim digne et devolte caelesti hac dape pascuntur, quomodo Christum in fratribus non agnoscent ac diligunt, necnon in ipsis egentem studiose adiuvabunt? Libet ergo haec verba S. Augustini iterare: «Accipite . . . et edite corpus Christi, etiam ipsi in corpore Christi flacti iam membra Christi; accipite et potate sanguinem Christi. Ne dissolvamini, manducate vinculum vestrum; ne vobis viles videamini, bibite pretium vestrum. Sicut in vos hoc convertitur, cum id manducatis et bibitis, sic et vos in corpus Christi convertimini, cum oboedienter et pie vivitis» (S. AUGUSTINI *Sermones post Maurinos reperti*, Romae 1930, III, 3, p. 19).

Quodsi ita hac superna utuntur alimonia, fideles etiam pignus habent illius beatitatis, quae, terrestri peregrinatione transacta, iis quasi rutilans dies, occasurus numquam, illucescet; scilicet ad verum et supremum vitae finem perducentur, in cuius adeptione germana felicitas continetur. Sed etiam ad civilia instituta Eucharistia vim quandam habet efficacem, siquidem contingere solet, ut populus, qui eam piis prosequitur obsequiis ex eaque vivit muneribus, quibus terrena conversatio recte componatur, locupletetur. Mentem igitur paternam ad multitudinem eorum convertimus, qui in ista urbe congregabuntur, ut Christum, sub speciebus panis et vini delitescentem, sollempni obsequio adorent, eiusque salutarem praesentiam in Brasiliae partibus, quas diximus, coaercent atque stabiliant.

Hisce autem indictis sollempnibus maius pondus tribuere cupientes, te, Venerabilis Frater Noster, Missum Extraordinarium Nostrum constituimus ac renuntiamus, Itibique committimus, ut Nostram in iis geras Personam coetibusque praesideas. Probe noscentes peculiaris amoris vincula, quae te cum Brasiliensi Natione coniungunt, ubi diu munus Nuntii Apostolici digne laudabiliterque gessisti, pro certo habemus egregiam te operam daturum, ut animi per sacrum hoc tempus ad ferventiorum pietatem erga Sanctissimam Eucharistiam salubriter exardescant.

Dum vero coniuncta studia sacrorum omnium Pastorum, eo spectantia, ut hic Conventus secundos exitus habeat, valde probamus et praedicamus, Deo supplices preces adhibemus, ut expectatam spiritualium fructuum copiam dilectae

Nobis Nationi Brasiliensi, maxime civibus terras memoratas inhabitentibus, benigne largiatur . Haec vota facientes, tibi, Venerabilis Fratser Noster, cunctis Brasiliae Archiepiscopis et Episcopis, Magistratibus, sacerdotibus, religiosis et universo populo, qui eucharistica haec sollemnia participabunt, Benedictionem Apostolicam, amantis animi Nostri testem, libenter impertimus.

Datum Romae, apud Sanctum Petrum, die I mensis Iulii, anno MCMLXXV, Pontificatus Nostri tertio decimo.

PAULUS PP. VI